

José Miguel S. Donata

Cariñosamente ...

Recuerdonan di mi wela y otronan





Cariñosamente ...

Recuerdonan di mi wela y otronan



Prome edicion: Aruba, 2010

Di dos edicion: Aruba, 2013

Contenido: © 2010, José Miguel S. Donata

Imprenta: ProGraphics Inc.

Coreccion di Papiamento: Marlon van der Linde

ISBN: 978-99904-1-301-4

No ta permiti pa multiplica y/of publica cualkier parti di e edicion aki den forma di imprenta, fotocopia, of cualkier otro manera sin permiso por escrito di e autor.

Foto di portada: Dos burico mohino (color preto) patras di Alto Vista pa cortesia di Teolinda Rasmijn

## Dedicacion

*Cariñosamente ... Recuerdonan di mi wela y otronan ta dedica na e Arubiano-  
nan di antes y specialmente na mi dos welanan Demetria Geerman,  
cariñosamente yama MEME y Armonica Geerman, cariñosamente yama  
MONCA, kendenan na nan manera a siña mi stima e isla aki.*



# Contenido

Algun Arubiano heroe di nan tempo ...	10
Federica Paulina Everon	11
Pamphilio Noguera	12
Luciën Donata	13
Luciano Kock	14
Modesta Maduro	15
Higinio Solognier	16
Pastor Maximiliano Quandus	17
Jacinto Donata	18
Marcelo Quant	19
Nicodemes Geerman	20
Leon Atanacio Croes	21
Julian Pieter Geerman	22
Felipe Gerónimo Boekhoudt	23
Demetria Geerman	24
Ignario Maduro	25

Anecdota	26
Zepelin e burico	27
Cielo a pega candela	28
Pasco a yega	29
"Boyo di mondi"	30
Tabaco di Shon TIN	31

Difunto ta traha	32
E flamboyant floria	33
"Mucha di respondi"	34





Algun Arubiano heroe di nan tempo ...

•

# Federica Paulina Everon

\*18 juni 1862 †4 januari 1949

Potret saca den añanan 40

Cariñosamente yama SHI FEDERICA, e ta yiu di un mama catibo cu a bira liber na 1858. El a nace na Papilon, pero un gran parti di su infancia y hubentud el a pasa na Paraguaná, Venezuela. Cu tempo el a muda di Papilon y a bay biba rond di su yiunan y nietonan na Rooi Congo, Sero Preto y Butucu. E tawata biaha hopi pa Paraguaná pa bishita famia. Semper el a keda bishita su famianan na Papilon tambe, saliendo for di Butucu na pia. SHI FEDERICA, banda di ama di cas, tawata cosedo y vlechtdo di sombre. Tambe e tawata gusta cushina masha hopi y traha cos dushi manera cocada, dushi di lechi, dushi di pinda, conserbe, pan seico y gofi. E tawatin e habilidad di carga bondro di paña, baki of wea riba cabes sin tene y sin laga nan cay. Algun nieta el a siña con pa haci esaki. Tambe el a yuda den crianza di algun nieta y bisanieta. E tawata gusta conta storia, haci chansa y balia. Tur caminda cu e tawata por, ainda na edad avansa, e tawata duna un man na famia y conocirnan pa yuda entre otro cu trabao di cas.



Foto: Cortesia di Emiliana Kock

Fuente nan di informacion: Demetria†, Maria y Susita Geerman

\**Geboorteregister, Huwelijksregister y Slavenregister, Archivo Nacional Aruba (ANA)*

# Pamphilio Noguera

\*1 juni 1867 †2 december 1953

Riba potret na banda drechi rond di 1933

Cariñosamente yama FICHI, den su infancia e no a haya oportunidad pa bay scol. E tawata plantado di cunucu na Savaneta. El a yega di cosecha na gran cantidad maish'i rabo, bonchi, patia y concomber. Awa e tawata bay saca na pos den vecindario y na Pos Grandi (esaki ta keda entre Savaneta y Pos Chikito). E tawatin un burico cu tawata yud'e pa transporte y hiba carga. Manera hopi Arubiano



cu a pasa den momentonan duro, FICHI a yega di piki den mondi mest di burico (pa gordura) y weso di bestia morto (pa traha boton) pa bende, ya cu no tawatin otro manera pa haya placa. Tambe el a traha den e mina di guano (fosfaat) na Sero Colorado (Sero Cora). Su ofishi tawata smid y na su cas el a traha y drecha articulonan di hero pa hende. Ademas, FICHI tawata piscado y tawata tira y traha taray. Semper el a dedica tempo na su cunucu. Maske cu pa motibonan di salud el a perde su dos pianan, sinta abao na suela e tawata chapi y pasa halado den su cunucu y a sigui planta y cosecha te na un edad basta halto.

Foto: Cortesia di Olivia Solognier

Fuente na di informacion: Carmen Solognier y Olivia Solognier

\*Huwelijksregister, Archivo Nacional Aruba (ANA)



# Luciën Donata

\*8 januari 1871 †30 juli 1953

Potret saca na Sero Patrishi 5 na final di añanan 40

Cariñosamente yama LUIS of WICHI, e ta nieto di un Indjan di La Guajira (su welo) y di un catibo (su wela) cu a bira liber na 1863. WICHI a planta cunucunan grandi na Sero Patrishi. Yuda pa su rumannan, yiunan y sobrinonan el a yega di cosecha na gran cantidad maish'i rabo, maishi grandi, concomber, milon, patia, pampuna y yambo. Tambe el a cria carne, cabrito y porco. Manera tawata custumber di cosecha, e tawata comparti carni y pinchinan di lechi cu su famia. Den su mangashina e tawata warda cosecha di maishi y bonchi pa uza ora cu e cosechanan no tawata rindi. Awa pa planta y cria bestia e tawata haya di yobida y for'di e tanki den su cunucu. E tawatin dos burico pa transporte, te ora cu el a haya su carioca. Ademas di plantado di cunucu y criado di bestia, WICHI su profesion tawata metsla manera su welo, su tata y su ruman hombernan. Como metsla, yuda pa su ruman hombernan, el a guia y participa den e construccion di misa San Francisco na Playa. WICHI tawata gusta conta storia di e bida di antes na Aruba.



Foto: Cortesia di Norma van der Biezen

Fuente nan di informacion: Norma van der Biezen y Marco Donata

\*Geboorteregister, Huwelijksregister y Slavenregister, Archivo Nacional Aruba (ANA)

# Luciano Kock

\*8 januari 1900 †21 september 1975

Potret saca na Bena di Koper, den vecindario di Jan Flemming

Cariñosamente yama CHANI, el a nace y biba na Ser'i Teishi y cu tempo el a bay biba na Cadushi Largo, unda el a planta cunucu grandi. Tambe el a corta aloe. Co-sechanan grandi el a yega di haya di maish'i rabo, patia, concomber y milon. Den su infancia e no a haya oportunidad pa bay scol, pero el a siña skirbi su nomber si. E tawata sa haci trabao di metsla y a bay traha un tempo na Venezuela, y na Cuba el a corta caña. E tawatin un burico cu yama Negro, cu tawata hopi balente y cu por a carga hasta tres hende riba su lomba. E burico tawata yud'e haci respondi y carga awa pa bebe y baña den halifat for di pos di Ayo te Cadushi Largo. E awa pa laba paña y muha mata e burico tawata carga for di Tanki di

Cas Ariba. CHANI tawata canta y pasa dande te cu Tres Rey. Cu tempo el a haya trabao na Lago como pipe fitter y a traha te cu el a baha cu pensioen. Semper el a keda dedica tempo na su cunucu.



Foto: Cortesia di Federico Kock

Fuertenan di informacion: Federico Kock y Monica Kock

\*Huwelijksregister, Archivo Nacional Aruba (ANA)

# Modesta Maduro

\*3 september 1900 +13 augustus 1996

Riba potret na banda robes, saca rond di 1947 na Santa Cruz 244

Cariñosamente yama DEDE, el a nace na Maria Maai (pazuid di San Fuego) y a crece na Santa Cruz. E no a haya oportunidad pa bay scol, paso su mama a fayece y e mester a yuda cuida su rumannan mas chikito y haci trabao di cas. Den su infancia el a yega di saca awa na pos di Masiduri y di San Fuego y piki palo den mondi pa cushina riba fogon. Cu 12 aña el a bay Curaçao pa keda cerca su madrina un tempo. Ora cu el a bolbe Aruba, el a dedica su mes na trabao



di cas y planta riba su mes un cunucu na Santa Cruz. El a yega di cosecha maish'i rabo, bonchi, pampuna, patia y pinda. Tur diadomingo of ora cu hendenan di bario di Santa Cruz, Picaron, San Fuego y Maria Maai bay misa of cualkier dia den siman bay haci respondi na Playa, nan tawata pasa cerca DEDE. Eynan nan tawata haya un boc'i awa y nan tawata kita nan pargati, hinca nan den un saco y bisti nan sapato pa sigui nan caminda. Ora misa caba of nan bolbe di Playa, nan ta pasa cerca dje atrobe pa kita nan sapato y bisti nan pargati, bebe un boc'i awa y sigui nan caminda. DEDE semper tawata gusta cose paña y tawata sa traha sombre di cabana. Tambe el a yuda tira bista hopi biaha riba baby y mucha chikito, cu mayornan di den vecindario tawata laga un rato cerca dje te ora nan bolbe di haci respondi of trabao.

Foto: Cortesia di Syra Rasmijn

Fuentenan di informacion: Sheila Maduro y Syra Rasmijn



# Higinio Solognier

\*11 januari 1901 †23 april 1991

Potret saca na Savaneta 357, den añanan 50

Cariñosamente yama FENCHI, aunke el a haya oportunidad pa bay scol di Savaneta den su infancia, e no a probecha, paso cada biahá cu nan mand'e scol, e tawata keda hunga cu algun compaño den mondi. El a planta bendernan di cunucu na Savaneta. El a yega di cosecha na gran cantidad maishi grandi, maish'i rabo, bonchi bonofes, bonchi kinchoncho, pampuna y milon di snechi. Na su cas tawatin un burico yama Zepelin y trempa den marduga e tawata bay cu e burico cu dos halifat riba lomba, un na cada banda, pa coy awa na pos den vecindario. Manera hopi Arubiano di antes, FENCHI a bay traha afo. Prome el a traha un periodo na Venezuela, despues na Cuba y na Curaçao. Cu tempo, manera hopi Arubiano, el a haya trabao na Lago (pipe fitter y forman) y a traha te ora cu el a baha cu pensioen. FENCHI tawata gusta cria cacho y e tawatin uno hopi stima yama Fini. Tambe e tawatin un auto preto chikito cu por a carga dos hende dilanti y un hende den bahul, yama Fonchin. Ora di bay pisca, e tawata uza su boto cu yama Ata Mi.



Foto: Cortesia di Olivia Solognier

Fuentenan di informacion: Carmen Solognier y Olivia Solognier



# Pastor Maximiliano Quandus

\*30 maart 1901 †27 februari 1957

Riba potret cu 29 aña, saca na e cas cu el a traha pa su mama na Chaparra, Cuba

Cariñosamente yama JAN, el a nace na Playa y a crece den vecindario di Noord y Tanki Flip. E tawata sa lesa y skirbi y den su infancia a yuda su mama cu trabao den cunucu y tawata tira liña na baranca pa pisca. Cu 14 aña el a bay Cuba y a traha un tempo cortando caña na Provincia de Oriente y a biba den e colonia di e Ingenio Chaparra. Ora el a ripara cu e cortamento di caña no tin beneficio paso ta 6 luna di “zafra” (cosecha) y e resto di e lunanan mester a busca otro medionan di bida, el a dicide di siña pa “maquinista” y traha riba trein, entre otro pa yena carbon y asisti e conductornan. Na final di 1937 el a bolbe Aruba y a bay traha na Lago, pero no pa mucho tempo, paso e no por a soporta mira con e Mericanonan tawata insulta y maltrata e trahadonan Arubiano humilde. El a tuma su retiro y a cuminsa su propio negoshi di bende fruta, berdura y pisca cu tawata bin entre otro di Venezuela y cu e tawata bay busca na waf na Playa. E tawata haci entrega na tiendanan den vecindario di San Nicolas y tawatin su dianan special pa bende banda di caminda y na su cas mes na Sero Preto. Cu su carioca y ayudo di su famia el a mantene su negoshi durante hopi aña, pero pa motibo di salud e no por a sigui y a fayece na aña 1957. Despues cu el a bolbe Aruba, JAN semper a keda mantene contacto cu su rumannan na Cuba.



Foto: Cortesia di Rica Quandus

Fuentenan di informacion: Dora Quandus y Rica Quandus

# Jacinto Donata

\*16 december 1903 †27 april 1959

Potret saca na Lago na aña 1958

Cariñosamente yama CHINTO, el a keda huerfano di mucha y no a haya oportunidad pa bay scol. Semper el a keda rond di su famianan na Sero Patrishi. Cu 16 aña el a bay traha na Santa Marta, Colombia den un plantacion di koffie yama Cincinnati. Despues di algun aña na Colombia, el a bay traha na Nieuwpoort, Curaçao den construccion y pikimento di guano. Despues el a haya trabao na Lago y a bolbe Aruba. CHINTO su profesion tawata met-sla y verfdó, pero el a planta cunucu tambe na Sero Patrishi y Cadushi Largo, unda el a yega di cosecha bonchi, patia y concomber na gran cantidad. Tambe e tawata pisca na baranca y tawata planta, cria carne, galiña y porcò na Rooi Congo den e terenonan di aloe di famia Ponson. Durante hopi tempo el a sigui planta, paso e tawata saca awa na pos di Rooi Congo y pos di Sero Preto. Ora di yobidanan grandi, ainda Lago tawata sa duna liber pa planta y e tawata probecha e momentonan ey. Su trabao na Lago no a strob'e di dedica tempo na su cunucu y bestianan, pero algun luna despues di a conmemora 30 aña trahando na Lago como pipe fitter, el a fayece. CHINTO tawata sa toca sonfonia di boca y di man hopi bon mes.



Foto: Cortesia di *Aruba Esso News*, 25 di october, 1958

Fuentenan di informacion: Armonica Geermant, Johannes Donata y Jose Donata

# Marcelo Quant

\*24 september 1905 †30 augustus 1987

Riba potret cu mas o menos 67 aña, saca na Butucu 11

Cariñosamente yama CHELO of CHECHE, e tawata plantado di cunucu na Butucu. E no por a lesa ni skirbi, paso den su infancia e no a haya oportunidad pa bay scol.

Manera hopi cunukeronan di antes, el a yega di cosecha maish'i rabo, maishi grandi, bonchi, patia y pin-da na gran cantidad. Tambe e tawatin cria grandi di galiña y cabrito. E tawatin un burico cu a yud'e hopi pa haci respondi y cu tawata hib'e Rincon (pariba di Vader Piet) pa saca awa na pos. CHELO a traha tambe den cortamento di aloe. E tawata conoce varios mata di remedi y tawata haci fa-



bor di bay coy entre otro rabo di cabay den mondi pa hende y nan tawata dun'e algo pa esey. Manera hopi Arubiano di antes, CHELO tambe a bay Cuba pa corta caña y despues el a haya trabao na Lago. E tawata mara barco y a traha durante mas di 20 aña como wharfinger na Lago. Semper el a keda dedica tempo na su cunucu y na su bestianan. Ora cu el a baha cu pensioen di Lago, ainda el a traha hopi aña na Fontein den plantacion di berdura.

Foto: Cortesia di Sylvia Schwengle

Fuenteenan di informacion: Enrique, Lucia y Sylvia Schwengle

\**Huwelijksregister*, Archivo Nacional Aruba (ANA)



# Nicodemus Geerman

\*15 september 1908 †5 januari 1989

Potret saca na Lago na comienso di añanan 50, algun luna prome cu e layoff grandi a cuminsa

Cariñosamente yama DENCHI, el a keda huerfano di mucha y no a haya oportunidad pa bay scol. El a nace y crece na San Fuego y cu tempo a bay biba na Butucu. Su ofishi tawata piscado. E tawata pisca na Piedra Preto y Cara Pabao (ambos luga ta keda na costa panort di Vader Piet). E tawata sa sambuya, landra bon, traha y drecha taray y reda. E tawata calcula e posicion di luna y strea ora di bay pisca. Cu tempo el a uza e almanak cu nan tawata lesa p'e. Ora strea cay, e tawata bay cu algun conocirnan na costa y piki webo di turtuga y hasta gara turtuga pa come. Cosecha grandi di varios sorto di bonchi, pampuna y maish'i rabo el a yega di haya. El a cria galiña, cabrito, carne y tawata gara coneu y yuwana pa come. Semper el a keda bishita su famia na San Fuego y Yamanota, sea riba burico of na pia. DENCHI tawatin e custumber di haci Fiesta di San Juan y cende candela den sabana pa celebra cu famia- y bisiñanan. E tawata lasa toro, coy colebra den baranca y e tawata saca curpa di hende for di den pos di awa. El a traha na Lago (cleanout) pa un tempo y despues a haya layoff. Djey el a traha na D.O.W. riba truck di sushi te cu el a baha cu pensioen. El a yuda tambe den construccion di Misa Santa Teresita. Den su oranan liber DENCHI tawata coba pos cu pik pa hende. Na comienso di añanan 50, el a muda cu su famia for di Butucu y bay biba na Rooi Congo (Palisiaweg).



Foto: Cortesia di Demetria Geerman†

Fuente nan di informacion: Demetria†, Seferino y Susita Geerman



# Leon Atanasio Croes

\*12 mei 1909 †31 oktober 1998

Potret saca rond di 1930 na San Fuego of Yamanota

Cariñosamente yama JOONCHI, el a yega te 6de klas, paso su mama a fayece y e mester a yuda cria su rumannan mas chikito. E tawata plantado di cunucu na Yamanota y a cosecha, entre otro, maish'i rabo, bonchi, patia, milon, calbas largo, concomber y batata dushi na gran cantidad. Tambe el a corta aloe den su cunucu y e tawatin un cria basta grandi di galiña, cabrito y porco. Pa transporte e tawata uza dos burico, cu a yud'e ora di bay saca awa na pos di Masiduri, pa asina haya awa pa bebe, baña y cushina. E awa pa su bestianan e tawata saca na un pos na Sero Behia (den vecindario di Yamanota). Semper e tawata bishita su famianan tanto na Butucu como na Corta Palo (pazuid di Butucu), y famianan tawata bay bishit'e y yud'e, entre otro, ora di piki bonchi y kita patia. JOONCHI tawata tocado di fio na fiesta, e tawata canta San Juan y pasa dande. Tambe el a haci trabao di barbero pa famia, bisiaña y conocirnan. Manera hopi Arubiano di antes, el a haya trabao na Lago como machinist y a traha te ora cu el a baha cu pensioen. JOONCHI semper tawata gusta cuenta di gayero y peleanan di gay.



Foto: Cortesia di Demetria Geerman†

Fuentenan di informacion: Rufina Croes, Demetria Geerman† y Susita Geerman

# Julian Pieter Geerman

\*1 januari 1911 †30 december 1980

Potret saca rond di 1930 na San Fuego

Cariñosamente yama PICHÍ, el a nace na San Fuego. El a keda huerfano di mucha y no a haya oportunidad pa bay scol. E tawatin un burico cu pa hopi aña el a uza como transporte pa haci respondi y pa hib'e di San Fuego pa Butucu pa bishita famia. E tawata plantado di cunucu na San Fuego y na Piedra Cacho (pariba di San Fuego). Tambe e tawata cortado di aloe na Yara (Savaneta pa-tras, pariba di Pos Chikito) y den cunucu di famia Wernet na Laga Bena (pabao di Sombre). For di su cunucu cosechanan grandi el a yega di haya: di maish'i rabo, bonchi, patia, concomber, milon, pinda y batata dushi di tres color (cora, blanco y geel). Ademá di plantado di cunucu, PICHÍ a cria hopi cabrito y galiña y e tawata piscado. E tawata pisca, pero cu un braso, ya cu el a perde e otro den un accidente. PICHÍ a yuda drecha misa di Santa Cruz varios biaha como boluntario y a traha un tempo na Thiel Corporation.



Foto: Cortesia di Demetria Geerman†

Fuente nan di informacion: Maria Geerman, Susita Geerman y Marcolino Gomes

# Felipe Gerónimo Boekhoudt

\*30 september 1912 †25 december 1991

Potret saca na Ayo na año 1955 cu un turista Mericano

Cariñosamente yama FLIP, el a nace na e sero unda e misa di Paradera ta traha y a crece na Ayo, na un luga cu yama Sheki, den cercania di Sero di Sumpiña. Den su infancia e no a haya oportunidad pa bay scol. Tempo di segura pisa (mal año), ora e cosechanan no tawata rindi y bestia y hende tawata muri, el a yuda su famia piki palo den mondi pa bende na Playa. For di mucha e tawata compañía su tata pa haci trabao den e benanan di oro. Cunucu grandi el a yega di planta y a cosecha maish'i rabo, maishi grandi, bonchi, pinda, pampuna, patia, yuca y batata dushi. Tambe e tawatin mata di guyaba y casho y el a cria cabrito, carne, porco y baca. E tawata piscado y tawata pisca na boca di Andicuri. Cu su burico blanco (e color ey nan ta yama sardo), cu a yud'e pa hopi tempo, e tawata saca awa na pos di Ayo y haci respondi te ora el a haya un carioca. Pa su bestianan e tawata coy awa di dam den su cunucu y den vecindario. Cu tempo el a haya trabao na Lago, pero pa un periodo masha cortico. Despues el a bay traha na D.O.W. te ora cu el a baha cu pensioen. FLIP tawata bon den trahamento di taray y reda, den cobamento di pos y den bora piedra pa bula cu dynamiet, entre otro na Canashito. Semper el a keda dedica tempo na su cunucu y bestianan y na bay pisca. FLIP a siña bruha lenga den Ingles y Frances for di su contacto cu Mericano- y Canadesnan.



Foto: Cortesia di: Octavio Boekhoudt

Fuente na di informacion: Octavio Boekhoudt y Leoncita Geerman



# Demetria Geerman

\*26 december 1914 †26 juni 1995

Potret saca na Butucu 12 na aña 1935

Cariñosamente yama MEME, el a nace na Papilon y a crece den Butucu. Den su infancia e scol mas cerca p'e tawata na Savaneta. Spierto pa su edad, el a salta 1ste klas y a caba 3de klas. E no por a sigui scol, paso su tata e tempo ey a bay traha na Cuba y pa 4de klas e mester a bay scol na Santa Cruz. Maske nan tawata hib'e riba burico for di Butucu te Savaneta, e distancia a bira mas leu. E ora, el a keda cas pa yuda cuida su mama cu tawata sufri di kebranto di salud pa periodonan largo, haci trabao di cas y cuida e cabritonan di su tata. Tambe el a yuda planta y cosecha den e cunucunan di su famia. For di



Butucu te na pos di Rincon (pariba di Vader Piet), na pia e tawata bay cu burico pa saca awa, yena halifat y piki palo na costa pa cushina. MEME tawata vlechtdo di sombre cu yama pihapa y tawata laba y strika paña pa hende. Tambe el a yega di traha como partera, bañado di morto y e tawata laba boca di muchanan chikito cu garganta y lenga malo. Tempo cu MEME a bay scol, entre 1920 y 1922, el a haya les di juffrouw y no di soeur y ora di haya straf, nan mester a tene un piedra di klei cu nan dos man riba cabes.

Foto: Cortesia di Demetria Geerman†

Fuente nan di informacion: José Miguel Donata, Demetria Geerman† y Susita Geerman



# Ignario Maduro

\*19 september 1915 †24 oktober 1980

Riba potret na banda robes, saca na costa pariba rond di 1950

Cariñosamente yama NASHI, den su infancia el a yega te 4de klas, paso e mester a yuda su tata cu trabaonan den cunucu na Watapana Gezaag. Den su infancia e tawata bay cu burico pa saca awa na Pos di Sero Preto. Cu tempo for di su mesun cunucu el a yega di cosecha bonchi, maish'i rabo y yambo na gran cantidad y tawatin varios



palo di mispel. El a cria cabrito, carne, porco y tawata pisca na baranca y piki cangreu. Awa pa su bestianan y pa muha mata e tawata haya for di un pos den vecindario di Watapana Gezaag y for di un dam na Fontein. NASHI tawata coba y traha dam y a yega di traha varios dam pa hende. E tawata sa toca cachete di burico como instrumento y tawata un di e prome personanan cu un auto, den e caso aki un carioca, den e vecindario di Butucu y Rooi Congo. El a yuda hopi hende transporta palo y otro carga. El a hiba hende dokter y hasta a yega di sirbi di shersh cu su carioca pa transporta difunto pa santana. Pa hopi aña, su number di auto a keda e mesun A-105. Cu tempo el a haya trabao na Lago como operator / tractor y a traha te ora cu el a baha cu pensioen. Despues di a baha cu pensioen di Lago, ainda NASHI a traha un tempo na Johnson Enterprises.

Foto: Cortesia di Demetria Geermant

Fuenteenan di informacion: Demetria Geermant, Diana Maduro y Maria Maduro

## Anecdotalanan

•

## Zepelin e burico

Recordando e cuentanan di mi wela MEME, a drenta den mi mente loke el a conta mi di un burico cu nan tawatin, yama Zepelin. T'asina cu Zepelin tawata un burico masha balente. E tawata nan burico di transporte, carga palo y halifat pa busca awa. Pa tur su balente cu e tawata, Zepelin tawatin un maña un poco fastioso.

Mi wela a conta con un biaha e cu mi welo DENCHI a dicidi di siya e burico pa bay coy salo na Cara Pabao (na costa panort di Vader Piet) pa sala carni. Nan a cuminsa cana y Zepelin despues di un rato, den pleno canamento a dal para y laga curpa cay riba un crench'i tera, PLA! Ata mi wela cu mi welo na sutament'i burico p'e lanta para. Mesora Zepelin a lanta para y nan a sigui. Nan a yega lama, coy salo y bolbe, pero na e mesun caminda, ata e burico a dal para y laga curpa cay riba e crench'i tera atrobe, PLA! Nan a pasa un trabao di otro mundo p'e burico lanta para, pero pa suerte niun tiki salo a bay perdi.

Mi wela a bisa cu Zepelin a keda haci e mesun cos te cu el a muri bay, sea ora nan bay piki palo of coy salo. Y ni por bisa cu e burico por tawata cansa of algo, paso Zepelin tawata come, bebe y sosega bon. Pero, manera mi wela a bisa, cu tempo nan a bin compronde cu ora un burico tin su maña, e n' ta lag'e pa nad'i mundo. Cu pasenshi mi wela cu mi welo tawata warda te ora Zepelin haya su gana di lanta para atrobe y sigui cana.

## Cielo a pega candela

Mi wela a conta mi cu e tawatin un comer cu a lanta hunto cu ne den Butucu. Pero ora cu su comer a bira grandi, e comer a casa y a bay biba den vecindario di San Nicolas. Semper ora cu mi wela bay haci respondi of spacha su comer, esaki tawata puntr'e: "Comer MEME, ki tempo bo ta sali for di e luga di fierno ayatras den mondi y bin biba mas cerca unda tin hende y tur cos?" Mi wela semper tawata contest'e: "Comer, no kibra cabes, ainda mi no tin gana di dreña cielo, ayatras den fierno mi ta biba trankil".

Wel, a resulta cu den tempo di Segunda Guera Mundial, e Alemannan a tira riba Lago. Ata hopi hende cu ta biba den vecindario di San Nicolas, na careda, bao grit'i yoramento a laga tumba, cabes derecho pa Butucu. Entre nan, mi wela su comer cu su casa y yiunan. Ora cu mi wela su comer a yega Butucu, el a puntra mi wela si nan por a keda algun dia eynan te ora cos calma, manera varios otro hende a haci.

Mi wela, cu semper a duna un man ora cu nan pidie, no a nenga su comer. Pero mi wela no a perde pa gana y, mirando su comer cu tawata tur span-ta, a bisa: "Comer, awor cu cielo a pega candela, ta den fierno mes comer tin cu dreña y sconde".



## Pasco a yega

Mi wela a conta mi cu un biaha bispo di Pasco, tempo cu mi mama y su otro rumannan tawata chikito, nan tawata bin puntr'e cada rato, ora di mula maish'i rabo y raspa coco: "Mama, kico mama ta traha?" Mi wela tawata contesta nan: "Mi yiunan, mi ta traha boyo pa Pasco".

Mi wela cu mi welo, hende humilde bibando den Butucu, tawata planta y cria bestia. Con cu bay con cu bin nan tawata lora. Mi mama y su otro rumannan, loco di contento paso nan lo purba e dushi boyo di mi wela, a comporta nan mes miho cu nunca y a haci bon mucha e dia ey.

Pa su manece, mi wela a core hiba un pida boyo na cas di un comer den Butucu mes. Ora el a yega cas, el a haya mi mama cu su otro rumannan na yoramento para den cushina. Mi wela, cu no a compronde dicon nan tawata yora, a puntra nan. Nan a bis'e tur tristo cu un shon, cu nan no conoce, a pasa y laga e respondi aki atras: "Bisa MEME y DENCHI cu PASCO a yega y mi ta pasa mas laat".

Mi wela, cu no tawata compronde e situacion, a bolbe puntra nan dicon nan tawata yora y tawata tristo anto. Mi mama y su otro rumannan a contest'e: "Nos ta yora, paso ora PASCO bin mas laat, nos no ta haya boyo mas, e ta hiba tur".

A resulta cu shon PASCO tawata un primo di mi welo cu tawatin e cus-tumber di bisa unda cu e yega riba dia di Pasco, pa saluda: "PASCO a yega ..."

## “Boyo di mondi”

Mi wela a conta mi cu hende sa bira macaco cu n' ta co'i conta, y te hasta lubida di unda nan a sali. T'asina cu un comer di mi wela cu e conoce for di mucha a casa cu un shon bon para y a haya un bon biba. Tempo a pasa y mi wela no a tende nada mas di su *comadro* te cu un dia el a top'e. Mi wela ya tawata sa cu su comer a cambia masha, tawata haci cos di hende fini y a bira macaco. Hasta tawatin caso unda mi wela su comer a menosprecia cuminda y bocadushi cu amigo- y conocirnan a ofrec'e. Mi wela a combid'e pa pasa bishit'e na Butucu, ya cu pa basta tempo nan no a combersa na smaak. Niun musca un bula, mi wela no a tende nada mas di su comer.

Te cu un dia a pasa algo masha pret cu mi wela su comer na cas di un bisiña. Ata mi wela su comer para dilant'i port'i cas di bisiña di mi wela. E no a duna ni e bisiña, ni mi wela sikiera un holo di chens pa nan cumind'e. El a pasa paden y a cuminsa keha. El a keha di e calor, di e camind'i Butucu cu tin hopi stof, di e holo di e cabritonan, enfin, un kehamento di otro mundo. Mi wela a contesta su comer: “Di berdad ta calor, pero n'e or'i Dios aki y cu e paña ey ta pa hende stoba”. Nan a sigui combersa y mi wela su bisiña a ofrece tanto mi wela como su comer un conchi di sop'i bestia chikito. Mi wela su comer a haci fini y a bisa: “Sopi kico, no danki”. Mi wela a cuminsa hari y a puntra su comer si ta lubida su comer a lubida con hende ta biba akibanda. Mi wela y su bisiña no a maha nan cabes y nan a sigui combersa.

Un rato a pasa y mi wela su bisiña kier a ofrece mi wela su comer algo pa wanta stoma. E biaha aki un boc'i koffie y un pida boyo. Mi wela su comer a nenga y a cuminsa keha atrobe y a bisa: “Ta con hende por come e cos ey?” Mi wela su bisiña, masha baldadi y pa frega, no a perde pa gana y a bisa: “Dios sa cu comer lo n' kier purba un pida boyo di mondi?” Mi wela y su bisiña tawata sa bon cu e comer no conoce esey. E comer a keda pensa un rato y a bisa: “Esey ta un boyo nobo cu mi no conoce, lo mi tin gana di purb'e y sa con ta trah'e”. Mi wela su bisiña a cuminsa hari y a bisa e comer: “E ta masha facil, e ta e mesun mansa di boyo, pero cu algo mas. Pa traha e “boyo di mondi”, mester corda tira den dje loke e buri-conan ta laga atras den mondi of na caminda”.

Mi wela su comer a pensa un rato, su cara a trek y a bisa: “Pero, esey ta mest di burico”. Mi wela su bisiña a contest'e: Si, comer, despensa mi, pero ya cu comer ta nenga tur loke mi a ofrece, no a keda mi nada otro di ofrece comer un pida “boyo di mondi”. Segun mi wela, di e dia ey tambe su comer a laga di haci su co'i macaco, danki na e “boyo di mondi”.

## Tabaco di Shon TIN

Mi wela a conta mi cu e nombenan di cariño di antes, combina cu dobel sinti, tambe por causa hopi harimento. Den e caso aki ta trata di dos compader di edad caba, cu e mesun number di cariño: TIN.

Un dia TIN a pidi Mario, un yiu di su bisina, hacie un fabor di bay busca tabaco cerca su compader Shon TIN, cu ta biba un tiki mas leu. Mesora Mario a bay haci e respondi pa su bisina. Ora Mario a yega na cas di Shon TIN, el a cuminda yen di respet y a bisa: "Bon dia, Shon TIN. Mi a trece un respondi di TIN. El a manda puntra si Shon TIN por manda prest'e algun foyo di tabaco, ya cu esnan di dje a caba".

E ora Shon TIN a contesta Mario: "Mi yiu, aworaki cruz ta bao y mi no tin, pero bisa mi compader TIN, cu asina Shon TIN haya tabaco, Shon TIN lo *manda pa TIN*". E respondi aki a causa un harimento di otro mundo bao di bisina, amigo y conocirnan y a keda den memoria di hopi hende, manera mi wela, pa basta tempo.



## Difunto ta traha

Mi wela a conta mi cu antes ora un hende muri, na cas mes nan ta baña y prepara e curpa di e difunto pa asina bel'e un anochi. No tawatin otro manera y tawata der'e e dia siguiente. Manera e bon custumber di antes, tanto famia como bisiña y conocirnan di leu ta bin pa condoleer, bela e morto y compañía e resamento prome cu bay dera.

T'asina cu a presenta su mes un caso basta pret na e entierro di un tercio conoci den vecindario, paso e no tawata di e balente ey y semper e tawata huy pa trabao. Wel, famia, bisiñanan a bela e morto aki henter anochi cu resamento y algun hende homber hasta a dal un betro. Pero ora cu e ora a yega pa hiba e difunto bay dera, su mama ni mata kier a laga nan hib'e. Cada rato e ta dal un grit'i yoramento ora cu nan bis'e cu nan tin cu hiba e difunto bay dera.

Ora ta pasa y nada, un yoramento di otro mundo e mama tawata haci. Claro, tur hende ta compronde e dolor di e perdida di un ser keri. Pero un señora resado a lanta para y a bisa: "Comer, ta duel mi mucho di comer su *pierdo*, pero ora ta pasa, ta bira mas calor y mester hiba e difunto bay dera, prome cu e curpa cuminsa traha". Net un bisiña bon betra y pompado, cu a pasá henter anochi ta dal betro y conta chasco, a drenta sala y a medio scucha. E no a perde pa gana y di biaha el a contesta e resado: "Shon, ni na bida e no a traha, ta con bo kier p'e traha awor na morto?" E harimento cu tawatin na e entierro ey, mi wela y hopi otro hende nunca mas a lubida.



## E flamboyen floria

Di e varios creencianan di mi wela, mi a bin haya sa cu antes mayornan no tawata gusta mira un mata di flamboyen cuminsa floria cerca di nan cas y menos den nan cura, si nan tawatin un yiu muhe dams den cas. Segun e creencia di mi wela, e flamboyen floria cora ta un señal di un muhe cu ta sali na estado sin spera.

A resulta cu un biaha e mata di flamboyen den cura di bisiña di mi wela a cuminsa floria te cu el a bira cora cora, masha bunita mes. Mi a puntra mi wela si el a wak e, anto e di cu mi si. E ora mi a bis'e: "Pero DUDU, e flamboyen ta tur na flor y e bisiñanan a muda hopi luna caba djeyan. Ta con nos ta haci awor? Paso e unico hende muhe cu ta biba cerca di e mata di flamboyen floria ta DUDU". Mi wela na harimento a contesta mi: "Mira mucha, bay na *dondro* cu bo".

## “Mucha di respondi”

T’asina cu ora mi wela a cuminsa sinti cu e no por a sali hopi mas for di cas pa haci respondi, su yiunan y algun nieto a cuminsa yud’e. Pero cu tempo ami a bira su “mucha di respondi”, manera e tawata bisa. Na cuminsamento cada biaha cu mi bay haci un respondi p’e, mi tawata haya un yotin, un florin te cu a yega na cinco florin. Semper e tawata bisa mi: “Ward’e pa bo cumpra algo”. Mi tawata tum’e, maske no cu mucho gana, paso mi no tawata kier a cobr’e.

Te cu un dia mi mester a bay haci un respondi p’e den auto, un tiki leu e biaha ey. Ora mi a bolbe, el a duna mi diez florin y mi a bis’e: “DU, esey si mi no ta tuma, paso diez florin ta mucho hopi”. El a keda insisti pa mi tum’e y ami a para ariba cu mi no ta acept’e.

Y, como cu mi wela tawata sa cu ami semper kier haya sa cosnan di e tradicion y folklore di Aruba, e no a perde pa gana y a bisa mi: “Wel, bo tin cu tum’e, paso cedido di bela mester haya su cori”. Eynan no a keda mi nada otro cu tuma e diez florin boca keto, pa mi por a haya sa e nificacion di e dicho. Paso, conociendo mi wela, lo e no a bisa mi e nificacion di e dicho, si mi no a tuma e placa. Cu e dicho aki, mi wela kier a duna mi di conoce cu *ora cu bo haci un favor, pa chikito cu e ta, bo tin cu ricibi algo p’e*.



u/oca